



Bosna i Hercegovina
Federacija Bosne i Hercegovine
Bosansko-podrinjski kanton Goražde
MINISTARSTVO ZA BORAČKA PITANJA

P R A V I L N I K
O USLOVIMA, NAČINU I KRITERIJIMA ZA DODJELU JEDNOKRATNIH
NOVČANIH POMOĆI ZA SLUČAJ SMRTI RATNOG VOJNOG INVALIDA I
ČLANA PORODICE ŠEHIDA/POGINULOG BRANIOCA

Goražde, februar 2020.godine

Na osnovu člana 56. i 66. Zakona o organizaciji organa uprave u Federaciji BiH («Službene novine Federacije BiH» broj: 35/05) i člana 204. stav 3. Zakona o dopunskim pravima branilaca i članova njihovih porodica u Bosansko-podrinjskom kantonu Goražde («Službene novine Bosansko-podrinjskog kantona Goražde» broj: 9/13, 11/14 i 15/19), Ministar za boračka pitanja Bosansko-podrinjskog kantona Goražde, uz saglasnost Vlade Bosansko-podrinjskog kantona Goražde **d o n o s i:**

P R A V I L N I K
O USLOVIMA, NAČINU I KRITERIJIMA ZA DODJELU JEDNOKRATNIH
NOVČANIH POMOĆI ZA SLUČAJ SMRTI RATNOG VOJNOG INVALIDA I
ČLANA PORODICE ŠEHIDA/POGINULOG BRANIOCA

POGLAVLJE I-OSNOVNE ODREDBE

Član 1.
(Osnovne odredbe)

Ovim Pravilnikom utvrđuju se uslovi, način i kriteriji za ostvarivanje prava na novčanu pomoć u slučaju smrti ratnih vojnih invalida i članova porodica šehida/poginulih branilaca - sufinansiranje troškova dženaza/sahrana ratnih vojnih invalida i članova porodica šehida/poginulih branilaca, (u daljem tekstu: lica iz člana 1.) koju mogu ostvariti članovi uže porodice ratnih vojnih invalida i članovi porodica šehida/poginulih branilaca sa kojima je umrli živio u zajedničkom domaćinstvu u vrijeme smrti.

Član 2.
(Objavljivanje javnog poziva)

Ministarstvo za boračka pitanja (u daljem tekstu: Ministarstvo) svaku godinu objavljuje javni poziv za ostvarivanje prava na jednokratnu novčanu pomoć za sufinansiranje troškova dženaza/sahrana u slučaju smrti lica iz člana 1. ovog Pravilnika po usvajanju Budžeta Bosansko-podrinjskog kantona Goražde (u daljem tekstu: Kanton) i programa o utrošku sredstava.

Član 3.
(Korisnici prava)

(1) Zahtjev za ostvarivanje prava na troškove dženaza/sahrana lica iz člana 1. ovog Pravilnika može podnijeti član uže porodice ratnog vojnog invalida i člana porodice šehida/poginulog branioca sa kojim je umrli živio u zajedničkom domaćinstvu u vrijeme smrti.

(2) Članom uže porodice u smislu ovog Pravilnika smatraju se roditelji, bračni partner i djeca koja su živjela u zajedničkom domaćinstvu sa umrlim licem iz člana 1. ovog Pravilnika do navršene 25. godine života.

(3) Zahtjev iz stava 1. ovog člana može podnijeti samo jedan član porodice lica iz člana 1. ovog Pravilnika.

(4) Članovi uže porodice ili lice koje je snosilo troškove dženaze/sahrane u slučaju smrti lica iz člana 1. ovog Pravilnika koja su ostvarila pravo na participaciju troškova dženaze/sahrane putem fonda penzijsko-invalidskog osiguranja, radnog odnosa ili po drugom osnovu u nižem iznosu od visine sredstava definisane u članu 7. ovog Pravilnika imaju pravo na odobravanje naknade na ime razlike između isplaćenih sredstava po drugom osnovu do visine sredstava participacije troškova utvrđenih članom 7. ovog Pravilnika.

(5) U slučaju smrti lica iz člana 1. ovog Pravilnika koje nema uže porodice i živjelo je kao samac, pravo na participaciju troškova dženaze/sahrane ima lice koje je snosilo troškove dženaze/sahrane uz predočenje relevantnih dokaza.

(6) Pravo na troškove dženaze/sahrane ne mogu ostvariti članovi porodice lica iz člana 1. ovog Pravilnika kod kojih postoje okolnosti iz člana 36. Zakona o pravima branilaca i članova njihovih porodica („Službene novine Federacije BiH“ broj: 33/04, 56/05, 70/07, 9/10 i 90/17).

POGLAVLJE II-POSTUPAK PRIZNAVANJA PRAVA NA NOVČANU POMOĆ ZA SLUČAJ SMRTI RATNIH VOJNIH INVALIDA I ČLANOVA PORODICA ŠEHIDA/POGINULIH BRANILACA

Član 4. (Način podnošenja zahtjeva)

(1) Odobravanje novčane pomoći za slučaj smrti lica iz člana 1. ovog Pravilnika vrši se na osnovu pisanog zahtjeva (obrazac u prilogu).

2) Podneseni zahtjev za ostvarivanje prava iz stava 1. ovog člana važe za budžetsku godinu u kojoj su podnijeti.

(3) Zahtjev za ostvarivanje prava iz stava (1) podnosi se organu nadležnom za branilačko-invalidsku zaštitu prema mjestu posljednjeg prebivališta lica iz člana 1. ovog Pravilnika.

(4) Donošenje rješenja o utvrđivanju prava na novčanu pomoć za slučaj smrti vršiti će se na osnovu poslednje objavljene prosječne isplaćene netto plaće u Federaciji Bosne i Hercegovine u predhodnoj godini, od strane Federalnog zavoda za statistiku.

(5) Članovi porodice umrlog lica iz člana 1. ovog Pravilnika koji žive na području entiteta Republika Srpska, zahtjev za ostvarivanje prava podnose najbližem organu nadležnom za branilačko-invalidsku zaštitu prema mjestu posljednjeg prebivališta u Federaciji BiH.

Član 5. (Obavezna dokumentacija)

(1) Uz zahtjev za ostvarivanje prava na pomoć u slučaju smrti, podnosilac zahtjeva je dužan priložiti originale ili ovjerene kopije dokumenata, kojima se dokazuje ispunjavanje uslova za ostvarivanje prava kako slijedi:

- a) lična karta podnosioca zahtjeva;
- b) CIPS-ova prijava o prebivalištu podnosioca zahtjeva;
- c) kućna lista kao dokaz da je podnosilac zahtjeva živio u zajedničkom domaćinstvu sa umrlim ratnim vojnim invalidom/ umrlim članom porodice šehida/poginulog branioca;

- d) smrtni list umrle osobe ;
- e) uvjerenje o pripadnosti Oružanim snagama, izdato od nadležne Grupe/Samostalnog izvršioca za pitanja evidencija iz oblasti vojne obaveze na obrascu FMB 3A (za umrlog ratnog vojnog invalida/umrlog člana porodice šehida/poginulog branioca);
- f) za ZAPOSLENE podnosiocze zahtjeva: potvrda poslodavca da nije ostvario pravo na troškove dženaze/sahrane po istom osnovu,
- g) za NEZAPOSLENE podnosiocze zahtjeva: dokaz da su na evidenciji nezaposlenih osoba nadležne službe za zapošljavanje ili ukoliko se ne vodi na evidenciji službe za zapošljavanje, uvjerenje ispostave porezne uprave kao dokaz o statusu nezaposlenosti ili ček od penzije;
- h) za ostale ZAPOSLENE članove domaćinstva potvrda poslodavca da nisu po istom osnovu već ostvarili naknadu za smrt užeg člana porodice;
- i) za ostale NEZAPOSLENE članove domaćinstva dokaz da su na evidenciji nezaposlenih osoba nadležne službe za zapošljavanje ili ukoliko se ne vode na evidenciji, uvjerenje ispostave porezne uprave kao dokaz o statusu nezaposlenosti, ček od penzije ili dokaz o redovnom školovanju;
- j) izjavu podnosioca zahtjeva ovjerenu kod nadležnog organa da nije ostvareno pravo na pogrebne troškove u skladu sa Zakonom o penzijskom i invalidskom osiguranju Federacije BiH („Službene novine FBiH“, broj: 13/18);
- k) kopija kartice tekućeg računa banke ili ovjerena potvrda banke, sa brojem tekućeg računa podnosioca zahtjeva;

Član 6. **(Postupak donošenja rješenja)**

- (1) Ukoliko je zahtjev za ostvarivanje prava na sufinansiranje troškova dženaza/sahrana potpun i ispunjava uslove za dodjelu pomoći u skladu sa ovim Pravilnikom, rukovodilac Gradske/općinske službe nadležne za boračko-invalidsku zaštitu donosi rješenje o ostvarivanju prava na sufinansiranje troškova dženaza/sahrana.
- (2) U postupku donošenja rješenja ovlašteni službenik je dužan izvršiti uvid i provjeru u sistemu neoporezivih nadoknada, kako bi se isključila mogućnost da je podnosilac zahtjeva već ostvario pravo na pomoć u slučaju smrti lica iz člana 1. ovog Pravilnika na drugim nivoima vlasti (Federalni nivo i dr.).
- (3) Zahtjevi koji su nepotpuni ili ne ispunjavaju uslove iz ovog Pravilnika odbacuju se ili odbijaju posebnim upravnim aktom, u skladu sa odredbama Zakona o upravnom postupku.
- (4) Protiv rješenja koje donosi prvostepeni organ nadležan za boračko-invalidsku zaštitu, može se izjaviti žalba u skladu sa odredbama Zakona o upravnom postupku Ministarstvu.
- (5) Rješenje o ostvarivanju prava na troškove dženaza/sahrana se donosi u 3 (tri) primjerka, pri čemu se jedan primjerak dostavlja stranci.

Član 7. **(Visina sredstava koja se može odobriti na ime participacije troškova dženaze/sahrane)**

- (1) Pomoć u slučaju smrti - sufinansiranje troškova sahrana/dženaza utvrđuje se u visini poslednje objavljene prosječne netto plaće zaposlenih u Federaciji BiH, prema podacima Federalnog zavoda za statistiku.

(2) Dodjela sredstava jednokratnih pomoći su usklađene sa visinom odobrenih i raspoloživih namjenskih sredstava Budžeta Ministarstva za tekuću godinu.

POGLAVLJE III-NAČIN I POSTUPAK PRIZNAVANJA PRAVA U SLUČAJU SMRTI DEMOBILIZIRANOG BRANIOCA

Član 8.

(Nadležni organ za rješavanje zahtjeva za slučaj smrti demobiliziranog branioca)

Pravo na participaciju troškova dženaze/sahrane u slučaju smrti demobiliziranog branioca članovi uže porodice sa kojima je umrli živio ili lice koje je snosilo troškove dženaze/sahrane ostvaruju podnošenjem zahtjeva Federalnom ministarstvu za pitanje boraca i invalida odbrambeno-oslobodilačkog rata putem Prvostepenog organa po mjestu posljednjeg prebivališta demobiliziranog branioca, u skladu sa Zakonom o pravima demobiliziranih branilaca i članova njihovih porodica („Sl. novine Federacije BiH“ broj: 54/19).

Član 9.

(Postupak prvostepenog organa nakon zaprimanja zahtjeva)

Organ nadležan za boračko-invalidsku zaštitu prema mjestu posljednjeg prebivališta umrlog demobiliziranog branioca iz predhodnog člana ovog Pravilnika, nakon zaprimanja zahtjeva vrši provjeru njegove potpunosti, po potrebi vrši upotpunjavanje istog i prosljeđuje Federalnom ministarstvu na dalje rješavanje.

Član 10.

(Prava na sufinansiranje troškova dženaze/sahrane iz Budžeta Kantona uslijed nedostatka raspoloživih sredstava u Budžetu Federalnog ministarstva)

Ukoliko u slučaju smrti demobiliziranog branioca, članovi uže porodice sa kojima je umrli živio ili lice koje je snosilo troškove dženaze/sahrane iz opravdanih razloga uslijed nedostatka sredstava ili drugih opravdanih razloga ne mogu da ostvare pravo na participaciju troškova dženaze/sahrane iz Budžeta Federacije u budžetskoj godini u kojoj su podnijeli zahtjev, ukoliko ima raspoloživih sredstava imaju pravo da isto ostvare iz Budžeta Ministarstva, u skladu sa članovima 3., 4., 5., 6. i 7. ovog Pravilnika.

POGLAVLJE IV- FINANSIRANJE

Član 11.

(Obezbjeđenje sredstava)

Finansiranje prava iz ovog Pravilnika za svaku godinu obezbjeđuje se do visine sredstava odobrenih u Budžetu Ministarstva.

U slučaju kada odobrena budžetska sredstva iz stava 1. ovog člana nisu dostatna za rješavanje svih podnesenih zahtjeva za odobravanje jednokratne novčane pomoći za sufinansiranje troškova dženaze/sahrane ratnih vojnih invalida, članova porodica šehida/poginulih branilaca i demobiliziranih branilaca za tu budžetsku godinu, iznos jednokratne novčane pomoći može biti i niži od iznosa utvrđenog članom 7. ovog Pravilnika, uz procentualno smanjenje iznosa novčane pomoći do 50% za utvrđeno pravo u članu 3. stav 4. o čemu odluku donosi Ministar.

POGLAVLJE V-PRELAZNE I ZAVRŠNE ODREDBE

Član 12. (Primjena općih propisa)

Za sve što nije regulisano ovim Pravilnikom primjenjuju se opći propisi.

Član 13. (Način izmjena i dopuna Pravilnika)

Izmjene i dopune ovog Pravilnika se vrši na način i po postupku koji važi za njegovo donošenje.

Član 14. (Tumačenje odredbi)

Tumačenje odredbi ovog Pravilnika daje Ministar.

Član 15. (Primjena odredbi ZUP-a)

Odredbe Zakona o upravnom postupku („Službene novine F BiH“ broj: 2/98 i 48/99) primjenjuju se u svim pitanjima koja nisu uređena posebnim zakonom i ovim Pravilnikom.

Član 16. (Stupanje na snagu)

Ovaj Pravilnik stupa na snagu danom dobijanja saglasnosti od Vlade Bosansko-podrinjskog kantona Goražde, a naknadno će se objaviti u „Službenim novinama BPK Goražde“.

Broj: 11-11-158/20
Goražde, 13.02.2020. godine

MINISTAR

Edin Aganović

Na ovaj Pravilnik Vlada Bosansko-podrinjskog kantona Goražde dala je saglasnost svojom Odlukom broj:03-11-247/20 od 10.02.2020.godine.